

E momento a yega pa Aruba haya un "Swat-Team"

ORANJESTAD (AAN): Mirando cu e ultimo tempo a worde constata cu e cantidad di droga confisca ta alarmante, y cu tin un aumento di detencionnan REGARDANDO e delito aki, sin duda alguno e tempo a yega pa Aruba haya su "SWAT Team".

E team aki mester ta forma cu efectivonan di Seccion Anti-Droga di ambos Cuerpo. Seguramente esaki lo bay duna seguramente resultado fructifero, como cu e ultimo añanan henter e asunto di Guardacosta ta un farce por completo.

DIARIO sa cu un tempo Cuerpo di Douane tabata dispone di algun personal cu hasta a drecha un boto pa asina nan subi laman (cu tur riesgo) pa asina frena e problema di droga. Nan tabata tin e curashi pa pone motor di un boto funciona, y apenas e boto tabatin speed pa bay dilanti. Pero asina mes

nan a pone na bida na peligro pa sali entre otro den oranan di anochi pa controla e diferente cai.

Pa aña largo gobiernonan a lubida cu e Cuerpo di Douane tin un poder masha grandi pa frena articulonan di ley relaciona cu entre otro contrabando, control cu vehiculo, pues den un solo palabra tanto riba tera y laman. Pero e Cuerpo aki a worde negligha casi por completo.

Mirando cu ta parce cu ta Aruba mes tin di regla su asuntonan, lo ta recomendable pa Parlamentarionan studia e posibilidad pa saca for di e dos cuerponan aki recomendacion pa gobierno bin cu un "Team di SWAT". E team aki lo tin e tarea pa controla nos frontera. Laga pone reglanan cu cada embarcacion cu sea ta sali of drenta mester duna notificacion. Esnan responsable mester entrega lista di esnan cu ta abordo, unda ta bay pisca of haci viahe di placer y ki ora lo regresa.

Cuminsando asina cu un control severo, lo por controla tur movecion den nos awa territorial. Nos no mester acudi na Hulanda pa sifa con lo por haci esaki. Tin contactonan estrecho cu Guardacosta Mericano cu seguramente lo duna un man gratuitamente. Nos mes mester cuminsa lanta cabez pa defende e pida baranca aki.

E cuenta cu "tur dia lo ta deposita informe relaciona cu embarcacion cu ta toca puerto di Aruba na Servicio Inteligencia Hulandes" mester bay pasa pa pasado, como cu no ta mira ningun adelanto cu e informenan aki pa añanan largo.

Ni un solo dia no a mira, corda tende Kustwacht Hulandes para embarcacion riba laman y controla contenido abordo, prome cu nan yega haf sea di Aruba of Antiyas.

Pa frena esaki mester di e Team pa actua. No ta mira pakico no por tin e contacto cu paisnan den nos propio re-

gion pa duna nos un man. Duna e team disponibilidad na aparatonan sofisticada y e luz berde pa sigui curso riba corto plazo si ta mester pa asina henter e operation ta den man di nos propio yiunan di tera.

Awendia, pa djis un poco "bulletproof vest", cuerpo Policial mester acudi na Comandante militar pa presta. Esaki den no por!!! Cuerpo mester por tin su propio jacketnan anti bala. Pone desde awe riba presupuesto y ni un dia despues.

Un simple cacho ainda gobierno of ministro no por regla pa cuminsa duna Cuerpo un man. Ayera pa colmo tabata tin un otro atraco, tin un cacho na e momentonan aki na Aruba cu por yuda den e buskeda. E cacho ta entre otro entrena pa tipo di casonan asina, tambe mester di un vehiculo special pa worde transporta esaki, te ainda no por a regla e asunto aki.

Ta di spera cu e proximo Ministro di Justicia *berdad-*

eramente duna e cuerponan aki e sosten y percura riba corto plazo pa tin materialnan necesario pa asina comunidad por drumi tranquil pa e team por labora.

Que hubo, si no tin e fondo disponible, lo por acerca e "service clubnan" pa inicia cu un proyecto. Nan seguramente lo duna un man pa yuda nos cuerponan bay dilanti ta un sugerencia. Tambe e cantidad di presonan cu tin den KIA por worde usa pa baha gasto di aparato di gobierno. Laga nan verf tur e edificionan di gobierno, pone nan bari caya di Aruba, corta mata y piki e rotzooi canto di caminda. Riba 150 Florin pa dia ta costa pueblo tur dia pa cria cada deteni den KIA. Segun informe tin mas di 200 persona encarcela cu ta costa mas di 30 mil Florin pa dia e montante aki, pues riba 600 mil Florin pa luna. E ora a yega pa enberdad ministro di justicia, cuminsa actua cu man fuerte. Nos no kier tende di "no" por, pero di "si" por.

Pueblo mester paga mas pa tramitacion den Domein Beheer

ORANJESTAD (AAN) -- For di entrante 1 di mei e gastonan administrativo relaciona cu otorgamento di tereno door di Domein Beheer, sea erfpacht, huur, opcion, ta aumenta pa pueblo di Aruba.

Esaki segun un decision tuma dia 16 di maart ultimo, pa Ministerio di Husticia y Obranan Publico.

E diferente gastonan administrativo tin di haber cu tereno pa construccion di cas, derecho di opcion, prolongacion di esaki y otorgamento di tereno pa uso comercial, dunamento di tereno den huur, duplicado di buki di huur, y acuerdonan precario.

Fuera di esey lo introduci e derecho pa cobra e gastonan di administracion pa e Decreto Ministerial cu no a worde busca door di e persona concerni.

SERIEDAD MARITIMO!!



DIARIO

826747